

晚晴移詩匯

晚晴簃詩匯卷二十七目錄

黎士弘

二十二首

許珌

十一首

吳綺

十四首

梅清

十二首

查詩繼

四首

曾畹

七首

王澤宏

二首

羅爲賡

一首

林堯華

一首

李璿

三首

陶憐

二首

孫中象

一首

陳忱

一首

蔣玉立

二首

陳數永

一首

田種玉

一首

徐旭齡

一首

圖爾宸

二首

史大成

二首

楊雍建

一首

李贊元

二首

孫光祀

二首

劉芳躅 一首

綦汝楫 二首

張惟赤 一首

梁熙 七首

張注慶 一首

周宸藻 二首

傅辰 一首

丁澎 十首

劉體仁 三首

劉元徵 二首

李繼白 一首

邱象升 三首

楊繼經 三首

曹申吉 三首

梁儒 二首

馮雲驤 八首

戴王綸 一首

陸求可 二首

胡在恪 一首

張聯箕 二首

紀元 一首

楊應標 二首

朱孔照 一首

張錫懌 一首

錢黯 一首

于鵬翰 一首

蔣中和 四首

董含 一首

王揆 二首

王撰 三首

盧廷簡 一首

晚晴籀詩匯卷二十七

徐世昌

黎士弘字媿會長汀人順治甲午舉人由推官歷官甘

肅布政司參政有託素齋集

詩話媿會長於吏事在塞上入年治軍書每至達旦  
功成引退當世高之少游李元仲之門稱入室弟子  
生平著作甚富人謂其文未嘗步武前人而動與古  
會詩格屢變大都刊落浮言清真樸老異於以聲悅  
者爲工

登虔州塔頂同朱具臣南昌游雲生

登臨緣分事吾自偶然來孤遠蕩聞見高危驗膽才長風  
牽壁立眾樹領江迴煙積山如幕晴吹次第開

佛祖峯山寺坐月

錯繡諸峯夜色安煙光樹氣積高寒蒼茫星漢容人立喧

地用余言面卷二十一  
寂林巒共佛看涼月有懷成獨笑清宵無累况登山紙屏  
細坐幽如夢何處幽香滿一欄

石鐘山

癸卯四月時送仲弟宣巖之在壽春

雙鐘峙中流高低互相位微風吹水波萬竅各鳴嚙仰觀  
造化心雕鏤亦爲罪濯濯蘇眉山捉筆工點綴放舟絕壁  
下領意得奇最子弟與山川韻事足圖繪夷考作記年送  
子德興尉余來涉江憐別弟趨吳會古人今不殊事跡偶  
相類離懷雖黯然妙得山水對西風泥行舟遂謀三日醉

大言

小心事貴人眉睫博意氣巢由拜馬首士亦各有志呼來  
坐堂下微筦煩顧視環指座上客是子覺稍異三公間九  
卿勉矣行自致馳歸語細君此是親傳示

莊生未聞道李耳故疎脫干將不示人鉛刀稱善割古來  
青塚上誰爲表清濁彼哉柴桑君孰詩詭寂寞公田忍不  
收乞食徒取薄

馬安稱巧仕潘生嗟宦拙萬物各枯苑造化何區別達士  
賤權奇名花厭高格蟋蟀知風寒鴻雁知霜冽泛泛水中  
鳧稻梁謀亦得

花發大堤西花發大堤東策馬誰家子蹠蹠凌春風行道  
各借問名父忝上公鬱鬱守貧賤執鞭甘所從

永新道中卽事

河水細如線峯峯見兀硯散石亘中流奔雷喧日夕山寒  
鳥不飛微雨灑衣溼牽纜百尺高隔樹明人跡薪煙望目  
勞羣虎見跳擲長吏本涼德敢怪爾充斥四顧井邑荒吁

嗟悼行役

下水苦逆風上水苦凍雨兩凍手足僵竟日行十里岸花  
歇眾芳磷磷見水底勉力事宵征眾聲合邪許孰知舟中  
人心更勞胼胝一官不自愛致身等腐鼠空歌行路難艱  
辛用自取

一山一山過細雨鳴嚶嚶西風號四野壯士安能豪嗟峩  
望城郭中多蓬與蒿雞犬不聞聲燈焰空寂寥老母隔江  
城兒心中夜勞仲弟陷文法意外生波濤日遣兩兒去急  
難京華路會與少弟見有淚如何注念之摧心肝焉得生  
羽翼不如顛倒卧庶幾忘百慮未明起披衣殘月猶在樹  
印無數

戊子西江兵變十一月始平廢印數百留南  
昌署中哀強人之不義也爲作印無數篇

亦何鼎鼎亦何輩輩大者丞相尙書御史大夫章細瑣參



軍丞簿尉大笥小篋聲琅琅還想當時盡朝貴書生白面  
朝典銓夕捲黃河擁高旆豪奴千指坐索人巨室高門閒  
過醉一九已墮睥睨牆燒燭侯家方嫁妹楚猴雖沐冠常  
裂春秋大義應書賊豈有中心事主爲國恩日日雕銅分  
暴客生不足憐死不惜陰風吹滿秋燈溼狼籍頭顱雜土  
飛獨餘廢印高屋脊

書來家弟遂已破賊大橋爲志數語

南塘小兒弄兵戲抹額紅巾等山魅夜切人肝作脯甘對  
裂輕繪如破絮殺人不死還等閒隨上軍門求補吏山中  
日日報揭竿百道軍書勒簿尉簿尉何能令請行牙兵幾  
隊趨山際昨日書來珍重看云已破賊數十輩留之不可  
誅不勝細作爰書別黨類我聞此語心獨歡賢者甯不當

如是嗚呼作賊不死死者冤民不作賊將徒然

己亥小寒走筆贈古林和尚

不見吾子十年矣子來遠渡西江水拜子顏色爲子歡遂  
能解脫了生死憶昔追隨全盛日破壁短檠同吮筆規模  
賈董公孫書指點雲煙酣六籍其時吾師楊長公

叔夜同里

沈

若陳錫

俱勁敵與叔胡生三十強摩空作賦徐庾匹各

各心矜吾子賢退讓不敢齒行立子家簪纓牀滿笏羣從  
諸郎廟廊屬子獨游跡掃朱門滄桑彈指逃空谷賢者所  
爲不可測學孔學釋非兩截大地應須截鐵人能穿虎豹  
探龍穴往事陳言空浩浩選佛歸來年尙少老大還念嫁  
時裳我爲子語子應笑三生石上靈巖山欲得從君覓領

要

題于慧男集藥地老人畫幀

前年曾見壁上山去年又看卷中樹道人邱壑自胸中水  
水石石紛無數使見所夢憶所歷歎者得息迷者悟青原  
山上山如簇何嶺何峯是其族我未入山見道人欲向此  
山先禮足譬如問鯖詣五侯纔過屠門已果腹春音居士  
殊高致抗首風塵仙作吏前身要是白社人乘閒便入青  
原寺又乞五嶽留真形道人撥墨供游戲我欲問君假此  
圖沿溪處處咸相誌他日入山或不迷不止盤礴領其意  
舟過建武夜行

不住因風好能爭半日程船燈敲石火人語渡河聲月上  
千峯立霜深一雁鳴經年南北路多半是宵征

貴溪小隱巖

出郭無多路，斯山遂覺深。四時全雨色，長夏逼秋心。野饌分僧供，殘碑與客尋。誰能容小隱，弭節媿登臨。

至南昌知周先生無恙且得手書庚子五日

到門驚喜公還在，痛定開函淚更流。萬死纔回明主顧，孤兒猶囑故人收。眾中薄命誰能惜，意外微生荷獨留。誤盡閩南碑下客，無端北望哭西州。

九日同集蔡翼皇太守來青亭

絕勝亭臺見遠崗，相將高處待重陽。幾行濁酒澆槐冷，盡啟疎簾讓菊香。人在他鄉知友重，客當佳序附官忙。竭來脫帽狂從事，手劃銀河數漏長。

九月晦再至南崖

是曾經到還如乍，置我真宜邱壑間。馬上得全看樹色，月

中記兩入秋山快遊盡興懷纔滿塵事經心悔欲刪勾漏  
沙牀他日約一峯一石與迴環

送別施愚山先生

先生七載湖西在到處人能說使君酌水自編良吏傳扶  
風新散講堂文半江煙雨催歸棹一日星辰渙小羣同在  
他鄉仍惜別相思囑寄敬亭雲

來甘州一載矣尙未紀其風物夙昔交遊問貽雜至  
特作六百字寫懷用柬知我

萬里黃河飛一線五州碁錯東西面

蘭州渡河而西爲武威張掖酒泉燉煌四

郡大旗日落照孤城畫角聲低迷故縣秦人百二誇山河  
明駝驥馬羌唱歌硤水淙淙石齒齒祈連千仞高嵯峩白  
頭父老說前事舉邊還指戰場地射殘鐵鏃半段鎗得來

換酒謀朝醉馬蘭苜蓿生沙州荒郵短驛連古溝四月寒

山催種麥風高六月猶披裘夾道鱗鱗見番族放馬滿山

羊滿谷天巴歲歲說防秋未必飲河能果腹番族舊屬西人歲索牧畜

名討天巴邊河西僧人著黃衣蟻蜂經卷銀字肥吞針羅

什不長見斗室維摩仍有妻或云此輩便其俗要使羈縻

歷荒服時平不問燕雀安防微深恐鼠蛇伏前年草地紛

請求閉關卻謝誠良籌豈可鴻溝割項羽甯容子敬分荆

州前西人請界廟堂勝策堅壁壘得使激瀾安弱水曾無

佛骨與仙才來東單車結雙軌弱水離山丹十書生落落

眞自豪一斗伊涼笑爾曹朝來起看雪山雪夜卧貪窺星

漢高甘州四山積金瓶新摘青粿熟萬顆勻圓薦紅玉梨

熟者曰金瓶穀早登者曰青粿葡萄一種曰公長槍江米

頤孫熟時紫圓綠蓋大小間垂東南所未見也

壓囊香聽盡甘州垂手曲

歌舞有大曲垂手小垂手

大曲中何曲最斷腸銀

笙吹月山半銜尊前鐵石頑司馬肯教閒淚澆青衫經年

此處似差樂土房煤甕傾羊酪譬如生長作邊人那識金

蠶開碧閣

甘州陶工絕少官廨俱以土覆

衙散清齋一事無還能憶我前

讀書鑿空博望出下策欲將繪幣聯康居繪幣東來千萬

軸單于城畔高粱肉

單于城去鎮百里

縱使貳師出渥洼何如入

駿追周穆還想子公破月支

張掖即大月支地

當時壯節稱魁奇

而我不煩折一矢談笑欲狹前人規幾人稱王幾人帝槐

柯蟻蛭眞兒戲

張重華呂光禿髮烏孤李暹段業沮渠蒙遜皆於河西僭偽號

重華空上

建業疏蒙遜解乞搜神記不知何代何王宮陰房鬼火遮

路紅彩虹已逐瓜蔓水尺碣挂壁誇奇功

龍王廟有西夏建橋碑

看

烏西飛兔東走功名富貴亦何有巧鸛當徑啄新蒲跋羊

卧路嚙殘柳，監倉公子無。乃愚不算升斗量，鉛銖作詩索。  
句如追逋胡爲嚙嚙，古徒我不敢效我友逸粗了簿書。  
吟抱膝虎頭燕頤百不須坐享清時懶投筆。

寄倪閣公汪舟次兩翰林

細數平交真爾爾，我記汪子與倪子。倪子恢奇磊落人，驅  
毫使墨如煙雨。萬卷讀破龍威篇，廿年久貴長安紙。晚交  
汪子章江上，珠光劍氣暱相向我宰山縣。苦低眉君臨溪  
閣時，微歎三日兩日走尺書。賴手清篇情骯髒，契闊經年  
限南北不見故人好顏色。前秋我始渡江歸，一讀除書屐  
齒折。豈因王貢侈彈冠，祇愛枚賈車連轍。太液池頭清似  
玉，聖人宏網收鴻鵠耐饑且索東方米。時清肯費景文燭，  
昌黎好在續長編。未要柳州書屢促，忽忽懷今轉念昔。天



寒雪大酸風急晴鶴久看沙苑飛顧曲亭荒新燕入

有懷周櫟

圖伯衡兩先生

何不早貴十年前見君並轡傳呼曰短章寫就特

寄君知君執卷挑燈立

許琰字天玉號星亭侯官人舉人官安定知縣有鐵堂

### 詩鈔

詩話天玉論交四海爲同輩所稱漁洋雙松詩云千秋萬歲知者誰閩海奇人許夫子其許與至矣一時如周櫟圖施尙白汪蒼文杜茶村吳園次皆與投分訂交

水吉舟中同李竹西

長芭

彭陶暇守歲

中原猶未達一月在風波晚泊人煙少殘年賊騎多客心  
依古埃春色到寒蓑蠻地填兵甲何時縛尉佗

### 浙江

浮生尙飄泊又作渡江人戰守留殘壘經過屬暮春湖聲

猶向越海色更通閩不見任公子蒼茫望古津

吳門聽歌

如憐行路客莫唱竹枝詞柳暗梁生塚花深伍相祠迎春  
歌扇急落月舞花遲無那彈天寶臨風起暮思

留別鷹垂次來韻

朝來放棄罷高吟老大徒羞華髮侵狗監已多妨薦語龍  
門真有倦游心秋風玉筋空關塞落日金臺自古今明發  
別君轉惆悵不知何處更招尋

河上寄韓固庵

十年復向帝京遊寥落金門索米秋西掖名花供判事北  
陵荒草對含愁客心遠泊烏龍水官火閒吟丹鳳樓詩賦  
似君真絕少才人自古重秦州

河上寄施愚山

僊郎大雅振鳴珂此日相思下濁河  
乘傳才名天下少驚人詩賦粵中多  
孤舟野火吟鸚鵡古戍寒刁散駱駝  
不盡蕭騷蘆荻月欲乘秋色敬亭過

鍾山詩次杜于皇韻

孝陵陵上草萋萋日落江南杜宇啼  
金瓦久經麋鹿竄玉環空鎖鳳凰栖  
青氛大地歸科斗紫氣中天散鼓鼙  
一自尊靈茲永螫才非曹植敢重題

石人十二舊戎裝繡柱參差咽夕陽  
朱雀埭前無木桁烏龍洲上有沙場  
暮烽偵海邊笳急秋燒彌山寶物荒  
玉隊依然松柏老銅駝零落淚雙行

御宿逶迤霜露寒人閒玉盃惜凋殘  
新朝常護龍虎騎高

廟空勞獬豸冠過闕謝翺揮涕淚吟詩杜甫奉心肝堆名  
金粟仍無恙漫說當年勢翥盤

崩湍壞道鬱清秋七孔橋前水不流賸有黃花園石柳絕  
無青鳥戀朱邱經年置戶圍丁散垂老司香宮監愁祇見  
長生荒苑鹿月明猶帶舊牌遊

訪王貽上於慈仁寺雙松下同作

騎馬橫過五都市獨數中原問王子才問近自泰山來置  
身卻在雙松裏入門拔地搖穹蒼老樹盤根渾四旁白日  
蔽虧鬱蕭莽樛枝拂拂棲鳳凰世間靈物忌孤美此松殊  
有相連理青銅降粒神仙家黑鐵修鱗帝王里銀欄繡砌  
徒岩巖六月高寒氣弗驕科頭其下吾與爾摩崖索碣尋  
前朝長嘯悠悠自千古虛壇忽聽生雷雨石風泉迴絕

塵如入靈源不知處因之雅欲遊山東齊州九點摩秦封  
爾歸岱側吾聞海明年野夫來看松

吳綺字園次號豐南一號聽翁又號紅豆詞人江都人  
貢生順治甲午薦授秘書院中書舍人歷官湖州知  
府有林蕙堂集

詩話園次以詩古文詞名海內者四十年駢體文尤  
工與陳其年並稱詩才富豔在玉谿樊川間性好客  
罷官後與諸名宿結春江花月社凡索詩文者多以  
花木竹石爲潤筆資不數月成林四各種字林嘗選  
宋金元  
詩行世

### 採桑篇

紫陌春風路柔條壓春樹曉起自攜筐盈盈採桑去非直  
爲蠶饑畏郎無好衣銀鉤正欲採驚出黃鶯飛鶯飛何快  
絕踏得桑枝折甯知桑樹中更有離人別

青山下望黃將軍墓道

霜花入江江樹紅半江落日搖悲風此時客向青山路遙  
見松楸竄狐兔推蓬指問黃頭郎云是將軍神道處將軍  
束髮事邊疆浴血榆關四十霜射雕并挽雙飛鞚回馬常  
持半段鎗曾經搏戰烏桓賊手戮長鯨襄水赤上相頻分  
卧內符諸侯競屈轅門膝手縛渠魁未報恩漁陽鼓入延  
秋門西京已下仙人淚南國還招帝子魂馬渡瑯琊從此  
化將軍定策同王謝豈知艷曲號無愁亞子空呼李天下  
天下龍髯痛未消臨春明月響瓊簫中涓厝養橫宮錦丞  
相家兒插坐貂就中更有陳留子宮門夜半傳黃紙盡逐  
元豐舊黨人半閒堂裏煙塵起傳檄言誅刁與劉武昌楊  
柳作邊愁巖疆已付中行說壯節空思祖豫州將軍義憤

填懷抱洗日虞淵何足道一朝失計在移軍清風小用臨  
江嘯倚劔空持南壁天北來烽火照甘泉橫江零落千尋  
索下殿倉皇七寶鞭此時將軍鎮姑熟宮中夜到驅黃犢  
紫髯怒吼陣雲昏虞歌夜泣蛾眉綠平明戰鼓動江鴉裊  
創猶呼御賜駟鳴弦豈意來鶉尾拔刃空聞叱虎牙可憐  
魂染胭脂血蒲首歸來事難說幾年墓木拱白楊夜夜猶  
然叫鴉鳩我聞此語心傷悲爲指江涘之高壘當年廟算  
列四鎮此地實爲君封陞癡兒不了公家事糶糊顛倒山  
河字罵賊不及雷海青弄兵竊效田承嗣將軍抗表建牙  
旌討逆應先李茂貞一喝逆流萬人死摧枯拉朽無堅營  
樓煩出射弓矢墮錦裘繡帽如雷火紫電橫飛靈寶刀紅  
冰膩結連環鎖至今白骨滿蒼山折戟猶存戰血斑豎子

無成悲廣武詞人多恨哭江南吁嗟將軍復何有從來運  
數多陽九留守魂遊宋氏河監軍淚滴唐家酒吾徒意氣  
豈能灰當時所用違其才夕陽下山黃葉雨江風颯颯魂  
歸來

聞其年以博學宏詞薦爲賦短歌

陳郎五年不得意青衫頽落凌雲氣忽聞天子下徵書鄉  
里小兒叫奇事兵興以後文章賤牙郎估客乘高轡盡謂  
黃金可致身公卿那用張華研吾儕有字何堪煮賤賣長  
門人不與妻兒大笑乃公痴何如且學揚州賈陳郎本在  
泥塗中一朝走入甘泉宮掀髯脫卻犢鼻褌乃知吾道非  
終窮吁嗟小兒小兒汝莫嗔當今天子重才人

蕪城歌贈送屈翁山



蕪城十月霜飛早遊子相逢惜秋草鏤管爭從月下吟瑤  
觴競向花前倒忽聞屈子天際來座中眾客歡如雷共言  
意氣爲君發共言懷抱爲君開聞君平生不得志讀盡奇  
書有奇事萬里麻鞋訊故人千金寶劍留深意踏遍人間  
古戰場掉頭不肯事侯王彈琴獨看文君鬢典酒頻銷陸  
賈裝幾年漂泊人難測憔悴蘭成歸未得八月槎浮桂海  
湖六朝山愛斜陽色偶然乘興來觀濤明月同尋廿四橋  
只有客憐詞客賦更無人聽玉人簫竹西握手天將雪滿  
路西風打黃葉送君又上白門舡秋盡垂楊不堪折杜牧  
淒涼夢懶成狂歌一曲別離情西園賓客皆雲散獨聽寒  
江暮雨聲

長椿寺夜坐對月同仲潛作

愛寂投僧宿君來亦不遣殘春生靜夜明月老空山幽境  
能相許塵心自不閒淡然同小坐風葉打柴關

重陽後三日再集采友堂

元卿夜啟關蠟屐集花間月靜羣鴉息天高一雁還世情  
逢酒淡客計向秋閒更有西山約楓林葉正斑

贈雨青上人

支公能好鶴閉戶託香林庭樹一何靜湖光相與深帆開  
知雨霽磬響落檐陰我自勞勞者逢君生遠心

歸雲庵夜泛同愚山阮懷諸子

山晚離城遠寒新怯暮遊亂峯爭落日一徑入深秋清興  
因官懶詩名借客留何時能解絨終夕對滄州

泊八里灘

漸遠青塘路，蓬窗懶更開。  
山煙孤塔迴，湖色亂帆來。  
吾道存書卷，餘生託酒杯。  
寄言鷗鳥伴，從此莫相猜。

同雲止過石公房

寒蕉拂拂與窗齊，老碧新香坐欲迷。  
一鉢軟煙梧子飯，半鋤涼雨菊花泥。  
閒支短杖調飢鶴，學定空牀過午雞。  
卻愧好山從結夢，明朝秋句不堪攜。

送石潭歸里

雪盡垂楊已漸深，臨歧折贈欲沾襟。  
三同身世兼憂喜，四傑才華半古今。  
嚴譴原非眞主意，貧歸長繫故人心。  
東門一送飛旌遠，莊舄淒涼有越吟。

夏日清嘯樓晚望

偶寄閒身不當歸，凭欄嘗對水煙微。  
鳥追斜日穿虹去，龍

鬪驚雷挾雨飛近海潮聲秋隱隱過江山色晚依依蘆中  
鼓枻無人在憔悴乾坤一釣磯

紅鷺館紀事

疎懶偏宜近墨莊披衣侵曉過林塘桐陰照檻客窗綠荷  
葉滿池人語香江雨欲來魚競喜山風忽動鶴先涼不辭  
永日攤書坐索有鄰家煮柘漿

再至金陵和田綸霞

頻年飄泊竟無成百不如人笑老僮學道幾經居藥市著  
書從欲賦蕪城原難富貴甯須悔便作神仙未免情五嶽  
縱游何不可那堪重入舊瑤京

梅清字淵公號瞿山宣城人順治甲午舉人有天延閣

刪後詩

詩話瞿山書宗顏魯公楊少師畫山水極雲煙變幻  
之趣畫松有奇氣猶洋稱其山水入妙品松入神品  
所作宣城廿四景大冊黃山雲海圖大幀皆刻意經  
營極鄉山之勝其家多以詩名王弇州嘗贈詩云從  
誇荆地人人玉不及梅家樹樹花風流可想江左軫  
梅氏詩略凡百有八人瞿山詩凡數變少年氣盛援  
筆成篇後刪舊作  
過半迺見遂懷

### 東嶽

作鎮紀崇望應星協神區乃惟羣嶽宗盤礴臨東隅峻哉  
何巍巍懸磴垂雲衢半壁俯全魯遠影繚勾吳我來春夏  
交瑤草方芬敷始臨一嶂斷忽出眾壑殊次第開天閭海  
色萬里舒樹挂飛蜃長石蹋扶桑孤羨門如可招挾翼將  
同驅乃知靈境別曠覽良不虛冥懷入神明喟焉思眞符  
風雨若有埃瑞應豈遂辜方期傳遙踪封禪奏成書  
神宮鬱岩堯曾巖露晶瑩遙望飛葦高驚指朝霞升陟磴

耀流目躋庭肅羣心我欲問太乙陳詞叩幽沈射牛典既  
遐瘞玉迹亦煙俯仰眷春祺惟此禴翟尊範金煥寶服色  
映河漢明幡幢何飄飄侍從羅羣星靈貺一以昭對越擬  
紫宸厥祀匪徒然錫胤蕃斯人載協勾萌期言應郊禩辰  
靈雨潤遙澤惠風澹羣氛浩矣青陽歌長此徽簫笙

石公從黃山來宛見貽佳畫答以長歌

我陟岱宗三萬丈倒矚扶桑起泱泱手摘片雲歸江東夢  
中縹緲碧霞上碧霞峯正青忽然接黃海石公貽我圖恍  
惚不可解絕巘陰森四壁寒雲巒窅冥驚漫漫玉屏五老  
爭拱立海門九龍紛乘驂驟疑仙嶠合轉訝眞宰通卧游  
當嶽表乃在天都峯天都之奇奇莫紀我公收拾奚囊裏  
擲將幻筆落人間遂使軒轅曾不死我寫泰山雲雲向石

濤飛公寫黃山雲雲染瞿劂衣白雲滿眼無時盡雲根冉  
冉歸靈境何時公向岱顛游看余已發黃山興

題畫雜詩

寒雲寒樹護山家巖壑無人一徑斜策杖行吟獨惆悵幾  
枝春色到梅花

秋空漠漠曉嵐清落木蕭蕭野水平愁向疎林停短棹天  
邊鴻雁最關情

上去江陵下石城亂帆都向夕陽明詩人好爲江干寫莫  
使青蓮獨擅名

朝來松響拂溪流六月寒聲似晚秋不是臨湖亭上客誰  
容此下一科頭

爲憐叔夜并憐松寫入生綃對影重但使撫絃能作調何

須遙問赤城峯

琴溪

高士遺臺東礪東俯臨百尺之飛虹雲卷雲舒絕壁下花  
開花落空潭中丹砂鍊去山俱寂赤鯉騎歸路不通歎息  
往來車馬客幾人招手問琴公

題畫答堵廉生

君鄉谷水清無敵酌水時時更憶君寄問松風雙塔靜可  
能忘卻敬亭雲

午夜歌

瞿硎山上鶴長飛瞿硎山中人未歸蒼松依石坐吹笛白  
雲好我霑裳衣白雲自流日將暮花枝冥冥隔溪路騰身  
直上東山頭騎鶴乘風欲飛去仙人久別今當還清宵忽



渡海中山到來拍肩更相笑萬歲一朝如等閒刁斗擊精  
悍歌舞揚芬芳空巖無事此良夜人間歡怨爭茫茫人間  
歡怨爭茫茫午夜夜時誰短長

越中漫興

秋風一騎越山清客路東來移我情梅市逢人仙是吏烏  
程作縣酒爲名

查詩繼字二南號愚溪又號樊村海鹽籍海甯人順治  
甲午舉人官霍邱知縣有深甯齋詩集

黃梨洲曰樊村詩撫時觸物憂以  
思勤而不怨有困風小雅之遺

詩話樊村宰霍邱有惠政會上官督催科甚迫題元  
道州春陵行詩呈之有民命眞當惜守官良獨難不  
因兩稅緩那得一州安之句見枕郡詩輯此舊鈔深  
甯齋集詩闕七律以下文祇序三十七篇蓋後人掇  
拾殘帙其馬草行礮夫行亦  
新樂府諷諭之體故采存之

馬草行

鐵甲三千動地來馬蹄雜沓如轟雷軍有供頓馬有穀縣  
官奔走如奴僕芻茭比屋困誅求府胥索錢不即收君不  
見江山城頭新鬼哭招魂無人鳥啄肉

礮夫行

十月王師捕山賊縣官追呼礮夫急一六當頭領僱夫百  
夫押以衙兵十此行只向烏傷去不比驪山送徒戍况復  
王官如父兄蓑笠餼糧爲爾具惡少奸胥暗結連一夫索  
錢八十千訛言街巷聲喧闐幕府飛箭龍旗鮮陰雨泥瀟  
滿天黑村鄰有夫招不得素封華屋尙張皇小戶單丁軀  
命逼縣官見此中心哀走謁太守申藩台輸金僱役從民  
願稅戶歡呼打漿回記得前年十月半倉前糧艘帆影亂

只今米爛未輸租又值役夫連海岸父母咨嗟望太平少年喜見煙塵生衣租食稅尋常事拜將封侯無爾名

後礮夫行

歲莫喧喧夜捉人當門縣尉點行頻押送江干下江船王牌忽下哀憐民蒙恩謹噪聲動地得錢脫役誇親鄰誰知羽書傳旦暮王師倉猝西興渡桃符竹爆空酸辛菜餌飢盤將不去雨雪江山煙火稀白骨支撐滿前路行到金華呈太守幕府無文停待人白晝呼羣掠遠村醉圍解尉攢拳毆解尉獐徨無羽翰科錢營脫離險艱黠徒乘機從此逝追至蘭谿半不還縣差承帖追逋目鞭笞狼籍空勞鹿歸時老幼盡歡欣重去難將消息聞男兒輕死貴死敵何不弓劍學從軍

後馬草行

四百八十礮夫行馬草十萬連催征縣官憐民省民解牌  
差斂費紛縱橫前年解錢塘今年解信安信安山多稻草  
少戶口流亡斷飛鳥營盤草多要折錢解吏索錢還索草  
去年溼草爛江干草戶於今杖血丹安得馬嘶息海岸樵  
歌出村聞夜半

曾畹原名傳鑑字庭聞甯夏籍甯都人順治甲午舉人

有金石堂集

詩話庭間明太常卿應遴子隨父軍中後奔走闕越  
關隴遂入籍隴西鄉舉後始歸省母與弟燦並工詩  
有蒼涼之音在甯都  
諸子中亦矯矯者

梅下望家信

又覺春風到梅花信不來隴頭赫連國庾嶺鬱孤臺地以

青天接書難白首開樽收邊徼淚長嘯大江迴

和黃岡杜于皇徵江贈詩

此生猶見汝幸汝不佯狂身世看秋籜乾坤正夕陽臺城窮徹骨夏浦飽經霜謾說工詩賦青燈鬢髮蒼

丙申自秦中歸送弟燦就耕烏石隴

每羨西周古千家尙力耕高原無奧草春日少人行襪袂空山滿衣冠亂世輕鹿門歸去好閉戶有松聲

晴川閣

大別排雲住楚山一望開亂流爭歲月孤嶼下樓臺高浪沓潛出夕陽幡冢來湖南征戰苦幾處角聲哀

贈顧松交吏部

直覺東歸似故鄉每逢佳節就君觴客中文讌如羊曼吳

下名園數辟疆芳草書凝歌扇綠落花春散舞衣香東山  
未許頻游玩早晚徵書發建章

鳴沙洲

不見黃河春氣動卻從沙磧辨陰晴恍澌著水天皆凍大  
漠無風山自鳴飲馬浪尋荒燒窟射雕貪出苦泉營傳聞  
烽火年來息張軌隗囂已盡平

題萬年少年伯隰西草堂

歌風臺下夜烏啼鬱鬱山莊古木齊半畝桑田人去住一  
湖春水屋東西星臨豐沛瞻龍虎地接青徐雜鼓鼙獨把  
漁竿憑月釣門前草色正萋萋

王澤宏字涓來黃岡人順治乙未進士官至禮部尙書

有昊廬集

易州新使院詠松

去年手植新松樹碧葉青枝取次陰榦長凌雲應有日後  
人誰識歲寒心

買花

賣花擔上露纔乾野老移來滿藥闌拋卻故山花事盛翻  
來燕市買花看

羅爲廣字西溪南充人順治甲午舉人官行人司行人  
過合州

放舟天未曉夢醒日初晴雲繪遠山色江流急雨聲岸沙  
留虎迹炊靄見荒城在昔繁華地荒涼感客情

林堯華字聞伯莆田人順治甲午舉人官榆次知縣有

浣亭詩略

去榆次縣作

做廬風雨足苔磯句漏尋砂覺昨非  
菱米有租充石鼎荃絲爲布翦山衣  
詩情獨往蠶抽繭酒興頻年鷓退飛  
聞道閩南開市舶過江通印子魚肥

李璿字岩山渠縣人順治甲午舉人  
官鳳陽知縣有片石齋集

聞笛

晚霽江城夜氣清  
寂寥孤月對愁明  
誰攜羌塞三更笛  
吹作吳山十月聲  
豈有梅花開更落  
自驚楊柳折還生  
天邊舊業歸何日  
爲爾今宵夢不成

榕城雜詠

民力東南久驛騷  
尙聞飛艦欲凌濤  
將軍自許標銅柱  
長



吏誰曾過石壕藜草夜呼朝市閉海田春隔繚垣高何當  
借箸籌方略願罷乘風破浪艘

別孫無燁

巖社棠陰晚未殘相逢誰復問南冠令君座上香三接公  
子門前鋏幾彈久客未聞生馬角累人何止愧猪肝擬將  
千尺珠湖水深比桃花一樣看

陶憐字冰修嘉善人順治甲午舉人官天台教諭

集徐文在山園

草堂倚絕巘山色映朝暉晴日凝花氣香風到客衣霜崖  
丹樹迴竹徑碧雲飛況是登高節長吟坐翠微

同諸子游石梁時張九夏不至

丹崖萬仞倚天高臨水登山託彩毫金嶺秋風馳列騎石

山見余言廿卷二二一  
梁落日挂寒濤劉根自是乘霞客子晉甯嫌控鶴勞竊怪  
季鷹招不至愍然亭下續離騷

孫中彖字易公號蓮溪桐城人順治甲午舉人有樓月  
堂詩集

秋日送戴山民游豫章

北山高枕卧煙蘿送爾長征感慨多猿狖夜啼孤嶺月魚  
龍秋靜五湖波尊前怨別攜吳劍客裏驚心聽楚歌若上  
滕王高閣望西山南浦近如何

陳忱字用亶秀水人順治甲午副貢有誠齋詩集

苕城雪中歸櫂

孤城門未啟風雪一舟停村店茅柴酒官塘牧馬亭逼寒  
頭轉白仄岸草猶青歲晏歸心迫鄉音易動聽

蔣玉立字亭彥嘉善人順治甲午副貢有泰茹堂集

渡江

江流九派盡朝宗六代繁華悵舊蹤千里雲浮瓜步樹片帆風送蒜山鐘鶯花半落愁邊過烽火頻年客裏逢五岳尙賒他日願何時汗漫一相從

寄魏交讓

青郊結伴共相招白社風流尙未遙日暝鶯聲聞柳陌春深花落轉蘭橈騷人自紀庚寅歲旅客重過丁卯橋我念離羣空對月懷君江上影蕭蕭

陳數永字離期號學山海甯人順治乙未進士官至工部尙書諡文和

依韻酬念祖弟歸應省試

河橋折柳悵難留且試驅車歷九州芳草平沙逢驛騎斜陽深樹見山樓洛中已識三都賦江上休披六月裘桂子秋風應早發好攜彩筆渡金溝

田種玉字公琢宛平人順治乙未進士改庶吉士授編修官至禮部侍郎加工部尙書太子少傅

詩話公琢以順治甲午舉順天鄉試第一明年卽登第迺翔臺閣剛介不諧俗左授奉天府丞乞歸卜居易水蒔圃自給康熙癸巳年逾八十景陵

詢順治中科目舊臣存問進秩又數年乃卒

海淀  
清秋人意豁引興到郊西金谷昔輝映濠梁今品題插天石劔轟拂地柳絲齊靜悟疑身隱荷香滿袖攜

徐旭齡字元文號敬庵錢塘人順治乙未進士官至漕運總督諡清獻

詩話清獻事親孝父死於寇行求瘞所以夢兆得之  
愿官清介有聲在都居槐市斜街出都後趙吉士給  
諫繼居之號曰寄園爲  
一時城南觴詠之地

送吳次公遊蓬萊兼呈沈留侯

爲厭風塵作客難且依仙吏策輕鞍燕臺碧樹雲初轉秦  
望神芝露未乾豈有侯門憐駿骨好從海客問金丹酒徒  
去住恩無定離思中宵月裏看

圖爾宸字自中滿洲旗人順治乙未滿洲榜一甲一名  
進士授修撰官至工部侍郎

晚鐘

梵放忽然寂前山聞暝鐘聲催斜景入路隔翠微重老樹  
警眠鶴空波迎古龍子心澹無慮真欲契禪宗

晚步

野色初開宿霧清晚晴天氣嫩涼生半陂新水鷺鷥立一  
架落紅鷓鴣鳴霽後煙痕連樹碧雨餘虹影接霞明蔣生  
三徑無人到悵悵行吟句未成

史大成字及超號立盦鄞縣人順治乙未一甲一名進  
士授修撰官至禮部左侍郎兼翰林學士有八行堂

集

送張越青給諫終養歸里

是處歸春雁鳥飛猶上林多君愛日疏先我望雲心臣齒  
幸還少主恩良自深望塵追可及策馬莫駸駸

范潞公去官歸里

山色故園好妒君歸及春詩從攜杖得名以去官眞林筍  
甘於蜜湖蓴綠似蘋試看紙尾署誰不歎風塵

楊雍建字自西號以齋海甯人順治乙未進士授知縣  
官至兵部左侍郎有弗過軒詩鈔

觀風臺

城上高臺接混茫天都風物鬱蒼蒼雲封雉堞千村繞地  
並烏聊六水長見說春溪仍樂土安知歛浦一殘疆黃峯  
極目徒相望贏得愁思滿客囊

李贊元初名立字望石大嵩衛人順治乙未進士改庶  
吉士授御史官至兵部侍郎有滴翠園集

詩話望石自庶常除侍御出按湖北手繫巨猾力雪  
冤誣以是有能名復巡淮釐清割設疏滯引革委掣  
嚴私販禁旁費復竈丁先後奏行擢督捕侍郎  
時逃人法嚴疏請芟改最苛者數事時尤稱之

春日登宏濟寺

縱覽曠無際長江一望深危亭穿石罅密樹散春陰帆影

當窗暝鐘聲入浦沉盤桓千仞上徙倚自長吟

錫山晚泊

片艇尋幽勝溪行幾曲灣夕陽微照水雪影盡歸山汀鷺  
河邊去漁舟浦外還旗亭何處問樹下綠陰閒

孫光祀字作庭號朔玉平陰人順治乙未進士改庶吉

士由給事中官至兵部侍郎有膽餘軒集

吳耕方招飲觀菊

秋光澄几牖入夜有餘清叢菊絢屋壁環向各爲情華鏗  
更交輝羣蕊滋晶瑩徵歌引羽商簫管間瑤笙曲緩落輕  
塵縹紗度新聲氣靜欲息機那復世味櫻嗟彼利祿客役  
役多所營何如付澹忘杯酒慰平生微醺醒歸路天半斗  
參橫



與郝雪海徐孟樞同事武闈賦贈

縱談晨夕慰如何柱史憂時感慨多誰靖烽煙蟠地軸擬  
攀星漢洗天河空聞甲冑盈邊壘可有熊羆入網羅但願  
四方銷戰伐無勞聖主大風歌

劉芳躅字增美號鍾山宛平人順治乙未進士改庶吉

士授編修官至工部侍郎

詩話鍾山爲五孺尚書餘祐子康熙中撫山東兵後  
彫敝免秋稅蠲丁徭通行賑卹刪除舊藩產稅外加  
租甚有惠於民竹垞嘗客其  
幕爲作漣泉記稱其清德

曲阜晚眺和朱竹垞韻

孔庭釋菜後攜客步莓苔犧象湯孫徹金絲魯殿開牲碑  
工拓就蒼草馬馱回愧少春秋癖言旋罷講臺

綦汝楫字松友高密人順治乙未進士改庶吉士授編

修厯官內宏文院學士有四友堂詩

送單牧之赴任灌陽

建陵迢遞半年程  
灌水爭如密水清  
月靜千家聞虎嘯  
峯迴萬樹聽猿聲  
依人翡翠巢官閣  
夾道桄榔接驛城  
報最何勞三載久  
於今南國已休兵

移居鄰王茂衍方伯

薄宦居難定  
移來思不窮  
高樓晴有月  
老樹夜多風  
閱世游將倦  
懷鄉夢欲通  
南鄰詞賦客  
恬澹此心同

張惟赤字侗孩號螺浮海鹽人順治乙未進士厯官工

科給事中有退思軒詩集

詩話螺浮在諫垣屢上封事嘗請停圈占革廠夫言人所不敢言時爭誦其議直有園在棗林街龔芝麓尙書有過螺浮飲及觀侍史龍梭演劇諸詩

東郡七夕立秋

光岳樓前暑氣收，斷雲疏雨送扁舟。  
關河暝色催砧近，海岱煙嵐入樹浮。  
天上雙星方渡漢，人間兩鬢又驚秋。  
明朝玉笛聲淒切，風起黃榆白雁愁。

梁熙字曰緝，號皙次，鄆陵人。順治乙未進士，由知縣歷

官御史有皙次齋彙

詩話曰：緝初令咸甯，廉能有聲。既入西臺，出巡茶馬，  
不取一介，與茗文阮亭諸公游，皆雅重之。文點與也，  
爲作江村讀書圖，茗文題云：鄆陵野色平於掌，也有  
江南此景無。阮亭云：江花江鳥不相識，寫向丹青俱  
眼明。茗文愛江鳥，江花之句復題云：江南於汝關，何  
事賦得愁心爾。許深語，輕俊至留別日，緝云：漉酒  
先生，祖闕徑，逃禪居士，好攜家，則肖其爲人矣。茗文  
與葉子吉各爲皙次齋記，謂侍御願居會皙之次，意  
以猶者自命，又作皙次齋圖，寄之繪一梧一石一鶴，  
跋云：先生齋中，非必有此數物，聊寓清標，逸況耳。  
詩二卷，蓋非專長，集爲子堦所編，家書吏牘，概錄靡  
遺。卽友朋贈言，亦盈巨帙，雖嫌汎濫，亦藉以考見平

也生

書砦居屋壁

陰氣昏白日凍雀噪暮枝徘徊如有待紆徐掩戶遲念昨  
愁不寐懸席透夜颼隙月點霜被病骨冷難支斷牆集野  
礫遂若愜幽私燒燈拾僵蠹竹素欣相披側身還悵望儒  
術欲何爲土壁搖寒影蕭條十年思

去秦

青陽催淑景林麓一朝新鳥鳴東郊路飄然今去秦惟昔  
抗遐想豈期傍風塵蒲鞭違夙願中夜自酸辛將投衡泌  
老翻作京國人潦倒時何濟展轉志欲伸父老壺漿惠道  
周擁勸頻今年雨澤足君不待芳春對此心惻惻幽懷未  
易陳知爾難忘舊淚眼寄渭濱

壬午出汴城五年不復經過丁亥計偕循內堤望壤  
垣有悲往事

斯城仍聚水過客欲招魂慘目今如見微生昔竟存民終  
煎市釜寇自盪宮門寇乘筏入周府復燒西城門樓河伯浮餘息臨流永  
戴恩

咸陽

青門昔傍渭濱行豈意秋風到渭城不盡寒波斜日動可  
憐荒野暮雲平雄圖過眼迷三輔別酒當歌疊四聲槐里  
宵深殘燭下還將雜記閱西京

早寒

秋風吹雨嘗如此不合蕭蕭入客耳碧草搖風溼欲翻元  
蟬抱葉冷然止祇林一卧歲時闌可奈無衣悲早寒悲歌

乍放聲還歇今日誰聽行路難

雨中遣懷和劉伯啟韻

無鉞彈時少爲圍閉日長匡牀秋得適布被雨知涼樹許  
江潭賦花因栗里香平生蕭瑟意身世好誰商

潼關

川原繚繞望中收西映殘陽舊戍樓形勢長連三輔壯風  
雲自湧大河流泥封函谷無諸國瓜種東陵有故侯還憶  
繁臺淪陷日曾開玉帳控中州

張注慶字元長號曲山聞中人順治乙未進士官御史  
巡按廣東

濯足仙女潭同費此度作

濯足仙女潭潭水清且潔輕儻出其間鱗次悉成列長挹

清流香芳餌非所悅猿嘯萬山雲漁歌兩岸雪我友醉濁  
醪爲探馮夷穴數詠吳隱詩不見心如結

周宸藻字端臣號質庵嘉善人順治乙未進士改庶吉  
士授御史有柿葉齋自東客游等集

張穉恭中翰招同高念侶副憲王蘭陔水部湖舫宴  
集

晴湖如練水雲收畫舫相攜興自幽幾處柳陰浮綠蟻誰  
家花影傍朱樓回思聚散憐佳會過眼風華感昔游搔首  
斜陽頻悵望乾坤何地是滄洲

秋懷

憶昔曾看禁苑花恩深甯敢效懷沙病收陶令三秋菊貧  
賣青門五色瓜邱壑道存惟我輩江湖歸老已無家不堪

往事空搔首獨立蒼茫起暮霞

傅辰字蘭生一字彤臣號麗農山東新城人順治乙未進士由推官歷官御史有瀛海燕居柏臺于役南游

家居美芹諸集

詩話彤臣初授河間推官以明允薦行取入臺出按江西值九江兵變命疾驅渡江具儀衛入城喻以大義召九江守給餉如額事遂定漁洋爲誌墓稱其忠信樸直能從容定變

廣川道中和貽上韻

道旁故壘跨連營積雪侵雲勢欲平莫笑角巾無武畧禁中頗牧是書生

丁澎字飛濤號藥園仁和人順治乙未進士歷官禮部郎中有扶荔堂詩集

詩話藥園早歲工詩列西泠十子中有白燕樓詩吳下士子爭著衫袖葵州吳賜如之器有句云恨無十



五雙鬢女教唱君家白燕樓爲一時傾倒如此通籍  
後與宋荔裳施愚山游復列燕臺七子集中五古詩  
體顏謝七古步武高岑其矯變豪邁間逼太白律詩  
精鍊沈雄雅近初唐爲同時梅村芝麓阮亭諸公所  
重及謫戍卜築南岡躬自飯牛詩益奇壯性不善騎  
每乘鹿車出游紫塞中詩瓢酒勺手一卷吟哦自若  
樵夫牧豎皆知爲藥圃先生也藥圃初官刑部冊立  
東宮無諳典禮者調入東省兼主客貢使至譯館廉  
知丁爲主客持紫貂玉  
犀從吏人易其詩歸國

酬吳司成梅村

風雅久淹沒延陵抱幽悵博涉慕馬卿遐覽追謝傅羲輪  
躍咸池羣星燦奔赴瓊瑤厲秋霜淋響諧寶璐青雲曠千  
載鸞鳳相追步驚飈動紫闥搖落思元賦玉池明光草金  
莖茂陵樹宮商紛迭陳斯音獨韶護

尋聚遠樓故迹感舊

層樓嶮峻雲溶溶下瞰縹緲之孤峯巉巖環拱若列戟歟

泉倒出雙飛龍湖山無恙城郭改老樹突存千丈松憶昔  
高宗常駐蹕南渡朝廷全盛日君王吟坐愛此樓月榭梅  
坡最清逸和甯門外提點呼御舟傳喚戲西湖教坊雜進  
太平曲六么爨賺紛笙竽王僥角觝林賽舞纏頭亂擲紅  
璣瑜宸游喜與民同樂寶騎香車日交錯北府兵厨雪王  
醅瓦子勾欄銀鑿落簫聲忽起熙春樓點花牌動青絲絡  
爭看吳憐唱柘枝山鳥不啼風雨索四百年來往事非銅  
駝草深螢火飛朝朝松柏西冷路何處梨花無燕歸雲鬢  
翠飾交龍鈿熏廟繁華眼猶見居人尙指玉津園畫船簫  
鼓喧波面紅裙低拜鄂王祠銀箏細撚平章院一旦黃塵  
動地來綺羅香散成蒿萊獅子巷中土花落酒市墟荒絡  
緯哀樵采時聞歌勅勒粉堞悲笳吹落梅不見南朝舊烏

鵲至今長繞越王臺

送劉石生之秦

萬里咸陽道三年復此行  
雁聲寒渭水秋色上蒲城  
日蝕秦碑斷天空漢時  
平尙留雙劍在風雨試長鳴

野眺

秋原落日俯長谿倚暮看山獨  
杖藜滿目蒲菰雙島外幾  
家煙火萬峯西泉傾古洞雲  
偏出人在青冥鳥亂啼精舍  
不殊尋柳谷惟令許掾得幽棲

左萊陽著書宅

生平苦憶左萊州  
謫去龍沙萬里流  
按曲能傳中散調  
遺書應恥茂陵求  
黃榆夜雪長驅憤  
紫塞春風幾換裘  
潦倒暮年誇健筆  
至今辭賦滿滄洲

報宋荔裳觀察

風起盧龍急雁行幾年歸夢渡漁陽  
髡斜季布藏車下鈎黨符融泣路旁  
馬怯危橋冰汨汨鶴鳴橫嶺月蒼蒼  
乾葵棘兔驚秋晚不敢逢人間故鄉

登岱

翠微宮殿俯危巒嶺坂逶迤更幾盤  
天近扶桑長不夜月明瑤草易生寒  
松鳴越觀留山鬼鳥啄秦碑淨石壇  
七十二君封禪地回中風雨想和鑾

孤懸海嶽枕神州得供盧敖拄杖游  
天外數峯開漢時星邊九點辨齊州  
情宵鶴搏浮雲落古洞龍吟斷壑流  
人在碧城看夜色芙蓉何處接層樓

飄渺神宮霄漢間丹梯突兀迥難攀  
蒼龍峪窈窕雲歸洞白

鶴祠孤雪滿山呼吸自能通帝座風煙原不到人寰未逢  
刻石千年事梁父吟成獨往還

千丈懸崖撼石閭捫蘿疊磴倒衣裾孤峯半落天疑盡絕  
頂平臨日乍舒帝女珠宮喧象珮仙官絳節駐鑾車白雲  
尙見封中起笙鶴如聞度碧虛

劉體仁字公馘潁川衛人順治乙未進士歷官吏部郎

中有七頌堂集

詩話公馘才氣橫溢詩文特其餘事既登第官郎署  
與王阮亭汪堯峯狎主壇坫存詩入卷雖不盡可傳  
而卽事抒懷中有真氣四庫提要謂其出入於竟  
陵公安之間未盡除明末仙人之習非篤論也

松村訪傅青主先生

城外好風日騎驢投谷口雙塔出深松厯村翻在後既涉  
石子溪乃望巖間牖柴門過樵牧試問在家否野色照鬚

眉下堦笑執手生平良內愧出言猶色忸淚睫述家門呼  
兒具杯酒汎愛答夙心所言皆師友移情縱談諧遂忘風  
塵久日暮徒依依中心亦何有

送戴務旃游華山

夜談太華奇朝起理輕策似子獨往意自然生羽翮我無  
濟勝具心懸神仙宅椽壁聞蟻緣索度或猿擲卽至玉女  
盆蓮花豈堪摘頗窮造化由能識巨靈擘一身出天地笑  
看培塿積歸來毛髓異定跨茅龍脊

贈歸元公

歸生聲名滿天地詞倒峽流腹經笥看山不計沽酒錢對  
客轉喉多觸忌口雖生花家屢空黃金不肯謁王公蕭騷  
星鬢對尊酒烏絲揮灑蠟炬紅歲暮一舟浮震澤第二泉

邊我躡屐相逢大笑把君衣楓楸丹黃霜燠白令君好客  
如臨邛狂談高詠爭爲工深杯如瀉三山海泛君舌上青  
芙蓉文采風流有先後君家太僕如北斗一時潦倒何足  
云星日光芒自不朽君今潦倒知者誰真成厯落復嶽崎  
寒波捩柁情無極清潁藏名理釣絲

劉元徵字伯誠號夢闡大名人順治乙未進士厯官刑  
部郎中有培園詩集

登京口玉山清音閣

策杖躡江巘臨風倚梵樓秋天出遠樹夕照見歸舟清磬  
雲中發驚濤檻底流坐來塵境隔疑是御風游

太平劉松舟別駕席上口占

江雲惜別年華易筇市論交意氣雄萬里行蹤驚去住百

年身世感窮通月明城郭潮聲滿雨霽池臺暑氣空好客  
中郎還倒屣倦游司馬自飄蓬

李繼白字夢沙臨漳人順治乙未進士由知縣歷官戶

部員外郎有望古齋集

虎邱寺

年年清夢虎邱游雨散花飛點石頭曲徑迷離山向背雲  
房深闔樹春秋梅舒冷豔香生閣茶試新泉雪滿甌好向  
五賢祠上望使君才不愧蘇州

邱象升字曙戒江蘇山陽人順治乙未進士改庶吉士  
授編修歷官大理寺左寺副有駮音入燕嶺海白雲

草堂諸集

江上雜興



白門霜落柳條枯誰買銀鱗過酒壚  
萬里行人千里雁夕陽相對下菰蘆

清遠峽

委折江如綫鋒稜勢益增曉昏雲氣變雷雨石痕崩  
洞古空猿跡庵荒暗佛鐙客心愁入暮高峽尙層層

苦竹渡

夕陽殘影沒衰眼翳長空樹暗驚人語溪寒避虎風  
戒心齊擊柝野火亂燒叢前路津門是星華望未通

楊繼經字傳人蘄水人順治乙未進士官大理寺評事  
有菊廬詩集

憶玉臺山春曉亭

玉臺芝老狼煙盡三十年前山盡禿玉臺花發春雨深  
又

向巖邊結茅屋屋前寂歷春曉亭春花爛漫春山青清泉  
欲斷不復斷春鳥未聽時可聽三年此別意長往石門苔  
磴隔塵壤昨夜燈前夢落花依稀似到山亭上

宿智印禪師道場

翠壁蒼崖接次寥參差黛巘倚雲霄夜寒元豹唳林密春  
暎驪龍聽法遙金鐸寶幢傳佛偈石梯殘字見南朝偶來  
欲脫荷衣去慚愧無因挂一瓢

憶蘄上舊居

五柳思歸不得歸桃花開後鰕魚肥幾時爲掉輕舟去自  
到湖邊放鶴飛

曹申吉字錫餘別號澹餘安邱人順治乙未進士官至  
貴州巡撫有澹餘詩選

宛邱春日行

欲雨不雨春色深青青嫩草俯牆陰幾樹繁花開欲盡  
叢弱竹不成林竹影花光時映水鳥飛未動聲先起憶向  
江邊怨去年卻來湖上思千里湖上韶華正可憐繞城春  
水盡漁船鷗鷺自隨雲上下樓臺直共水淪漣隄上誰家  
新種柳裊裊游絲紛左右燕至欣逢上已前鶯啼已過清  
明後上已清明煙色濃太皞陵畔數株松宛邱自有西湖  
樂夢裏青峯三四重

聽歌者周生

參軍絕技出天然曾侍開元供奉筵幾部龜茲零落盡至  
今人識李龜年

湘陰

蕭瑟黃陵廟依依帝子靈渚邊蘋自白湖外草猶青雲薄  
紛遙岫煙寒隔淺汀當年虛九辨高詠有誰聽

梁儒字宗洙漢軍旗人順治乙未進士歷官江南提學  
道僉事有徽音集

游西山

磴道盤空上禪關半夕霏樵聲散幽谷山翠溼行衣帶露  
危花墜穿林獨鳥飛逍遙塵壒外得意便忘歸

春初雨中獨坐

煙雨濛濛隔薜蘿雨中極目試如何好山入望青猶淺芳  
草綠隄綠未多濁酒筍來聊自適新詩吟就獨高歌人生  
行樂須臾事莫放春光取次過

馮雲驥字訥生代州人順治乙未進士康熙己未舉博

學鴻詞歷官福建督糧道有飛霞樓詩雲中集國雍

草沱園偶輯瞻花稟涉霞吟青苔篇

詩話講生少承家學聲譽藉甚蔚州魏敏果曰爲畏友己未以訥生與湯文正畢布政振姬並薦鴻博當世榮之性和易與人接從無疾言遽色而居官侃侃守正不阿所至有聲爲後進所師事蜀人祀之文翁祠閩人祀之朱子祠皆曠舉也

時序篇

童童山上松條條風中柳四時一以化貞脆隨所守人生  
天地間苦無金石壽陰陽不停馭霜露變林藪小人羨榮  
利志士恥升斗余生三十年碌碌猶奔走探海斬妖蛟利  
劍不在手側身視風塵哀歌對樽酒明月寫素心孤雲結  
良友曾許稷契儔羞居管晏後進未奮功名退非耕畝畝  
一身半浮沉百年任休咎今古浩無涯悠悠歎白首

述懷

人生各有命富貴安可求  
靜心服道素泉石恣優游  
冥鴻遠者羨文犧志士羞  
傷彼陌上花疾風吹未休  
去爲溝中泥妍華詎可留  
南山有古木曾不畏高秋

猗猗蘭蕙香露濯鮮華  
好采爲君子佩過時恐枯槁  
蘭蕙何易衰茂茂菘菘草  
丈夫懷遠猷乘時苦不早  
意氣矜豪雄日月贈人老  
身世歎悠悠忠信以爲寶

雲中行贈王廣生

邊風動地吹沙白雲中  
三月春草碧舊內荒涼長  
野蒿飢鳥哀鳴啄亂石  
我來弔古倍淒然蕭條野  
燒望平田崖崩黃土麒麟  
塚苔沒紅樓玳瑁筵紛紛  
駝馬城南去蹇策一聲天  
欲暮甲光慘淡寒霜明  
大旗縹緲愁雲護况復  
臙軻

歎鄭虔空齋寂寞冷朝煙傳經莫謾誇劉向載酒何人過  
草元王子峩峩天下士攜來一束牛腰紙白雪裁詩富新  
詞朱霞摘藻發奇理開樽共醉碧桃花渾忘踪跡在天涯  
吹來柳絮依人袂飛過黃鸝照影斜當年趙女能歌舞可  
憐羅綺爲塵土玉貌香消白蝶春花魂夜濕青燐雨白登  
臺邊古戰場荒墩老木迴蒼蒼雕戈埋月沉空壘石馬嘶  
風倚壞牆龍堆遙望愁何極平郊月道迢迢直與子高歌  
一愴神南山萬古傷心宅

潼關行

潼關城下月如水潼關城上鼓聲死司馬北望拜神京臣  
報國恩畢於此萬羣寇馬踏沙黃長戈大戟飛寒鉞彎弧  
舊將嬰城鬪斷甲材官泣戰場孫公灑血潼關道鬼馬不

歸嘶碧草花袍玉劍委紅泥渭水飛鴉波浩浩冰巾幘  
何嶙峋就義從容不顧身雛鳳玉顏同日死千年石砌閉  
青春幾隊蛾眉愁耿耿飛鳥輕身墜碧井綠鬢吹爲夜雨  
苔紅衫化作流霞影有子蒼茫西向秦荒園遺跡訪蒿榛  
昔日夾道紅旗陣今日空衝動野燐愁雲覆井寒煙古秋  
風蕭蕭黃葉雨玉骨曾傳葬此中鬼神長護埋香土牽來  
素縷古龍驚莊容衣佩宛如生觀者萬人共歎息方知天  
地鑒幽貞重向戰圍淚沾臆青山一帶愁何極元戎戰骨  
碎刀痕魂魄茫茫招不得更有遺孤已二年父老指點私  
相憐破巢漫說無完卵趙氏嬰兒自瓦全同時飲劍有喬  
公呼天拊膺氣何雄腰橫寶帶眠頽蹠手擲頭顱向晚風  
眼見山飛滄海立銅駝霜冷荆榛濕甯武孤城再合圍餘



者降旗拜寇入吁嗟乎悲哉國家之亂誰爲基英雄數盡  
際艱危翼虎已分鶻首策趙卒長平大聚時一門仗節古  
來少日月飛光同皎皎青楓夢斷麒麟圖香閨血化鴛鴦  
烏有臣死國婦死夫高風大義厲頑愚嗚呼其形往矣神  
未徂嗚呼其形往矣神未徂

喬公遷高字元柱定襄人以明經官監軍道罵賊伏劍死

撥悶

大漠草竿竿羈愁望遠天風斜高鳥影雲淡落花煙遲暮  
憐吾道干戈閱歲年南山歸去好涼雨種瓜田

懷唐于野

唐生甘石隱高卧大江秋片月依蓮社孤雲隱竹樓煙花  
六代渺詩卷萬年愁徙倚層樓晚雲橫白鷺洲

贈李天生

與子幾年別重來欲白頭徘徊今日飲慷慨古人愁雁度  
千山月雲橫大壑秋向禽曾有約汗漫幾時游

戴王綸字彥極一字經碧號一齋滄州人順治乙未一  
甲二名進士授編修歷官江西糧儲道罷職康熙己  
未舉博學鴻詞

章門新秋送客北上因寄龔芝麓年伯

楚天秋色動征橈北望燕山道里遙此去酒壚誰擊筑一  
時江月正吹簫雲生驛路銅龍曉沙滿關城鐵騎驕勞苦  
中丞高諫議可無書訊下雲霄

陸求可字咸一山陽人順治乙未進士官福建參議

大田驛曉行

衝煙行古道長劍伴孤征殘月曉猶白吟蟲秋愈清氣蒸

知海日潮起聽江聲欲向芳洲上褰衣擷杜蘅

福永道中

滿目憐凋瘵荒原不忍看炊煙一路少廬舍幾村殘澤畔  
烽初息居人夢未安蕭蕭風雨後空見海濤寒

胡在恪號念蒿江陵人順治乙未進士歷官江西鹽道  
有真懶園集

張翁止宿

檐雲爨鍵倚江邊籬菊蕭疏暮柳前漢上抱來空有甕成  
都卜後並無錢榻懸客夢生殘月酒醒鄉關隔曉天莫道  
一廛猶小隱青羊相憶計何年

張聯箕字德生號卽公益都人順治乙未進士由知縣  
歷官徵江知府有穆如軒詩略

卽景

結邑依山麓荒城物候偏三時常過虎七月未聞蟬舉案  
黃齏飯投牀白褐氊炎涼忘世味我欲慕巢仙

權知吉州九日感賦

空庭惟落葉閉戶見秋山雉堞連雲暗溪流抱郭灣白衣  
人寂寞黃菊色爛爛徒有闥門役登登版築間

紀元字季愷號子湘文安人順治乙未進士由推官歷  
官鞏昌知府有卧游山房橐

夜至西湖對月獨坐

新秋纔見月湖水散清輝林外花初落池邊鳥自飛兩峯  
迴竹嶼一艇到山扉庭際當搖落懷人應未歸

楊應標字勝林號南城嘉善人順治乙未進士由推官

歷官劍州知州有永思堂集

靜夜

夜久羣動息秋潭冷素心推求往古事歷歷羅胸襟守貞  
道所貴回遙眾乃任滔滔江湖流一往不復禁窮巷罕過  
轍寂寥鳴素琴長松挺孤秀何憂霜雪侵

東明河上口占

重重隄岸繞東明盡是黃金力築成不用防河桑柘滿老  
農帶月荷鋤耕

朱孔照字浴曙號雲台應山人順治乙未進士官蘇州  
同知

游天井澗寺

攬轡蒼茫裏東風曉日斜香吹新草木綠徧舊桑麻山碓

春流水茶鑿煮落花不知城市近猶有此煙霞

張錫懌字越九號宏軒上海人順治乙未進士官泰安

知州有樹滋堂近橐

詩話越九寄情山水舉結轡之氣一寓於詩官泰安州州有捨身崖愚民往往投其中越九甫親事卽禁止廣學舍減香稅復四氏學州人稱之被議歸居默雲閣著書以終

喜吳漢槎南還次徐健庵韻

思君頻望玉門關少壯漂零萬死間同去幾人多白骨生  
歸一輩半蒼顏江鄉楓冷家何在塞磧雲迷雁獨還聽說  
流人最腸斷黑河無渡水潺湲

錢黯字長孺號書樵嘉善人順治乙未進士官池州推

官有潔園存橐

詩話書樵爲塞庵相國孫官池陽年甫及壯告歸杜門著述年九十五乃終登第逾七十年一時稱罕見

也

過涇縣水西寺

馬蹄得得趁平沙  
高下林巒入望賒  
淺瀨過帆迴雉堞淡  
煙籠竹隱人家亭  
涵疏雨松濤細寺俯  
驚雷夕照斜客路  
風光在何許紙窗月影到霜花

于鵬翰字六息號山白文登人順治乙未進士官峽江知縣

臨川雨夜

寒雨瀟瀟夜偏來  
客邸多蕉聲殘漏滴  
竹戶野雲過潦倒  
荒陶徑風塵慚邵窩  
倚牀將假寐何處賦離歌

蔣中和字本達一字位公晚號眉三子靖江人順治乙未進士官蘭陽知縣降滄州州判有半農集

詩話位公詩境冷峭甯澀無恬甯野無俗拙於爲吏窮老著書集中文多於詩好尙論古人蓋畸士也靖江僻邑傳人甚稀斯其佼佼者

詠懷

萬里繞長空秋雲浮海曲海曲有伊人長嘯無係屬歛霞  
以爲衣嗽波以爲粟落日沒千山荏苒又初旭神龍亦可  
烹所患在多欲

繩牀繫尺瓠霜月掛庭樹皎皎清夜心幽人起獨步昂首  
盼空濛雲自疏林渡無端發清響蟋蟀吟秋暮自問有何  
知還笑杜武庫

洞庭多奇波終南饒積翠常與世相親亦與世相棄孤鶴  
有餘情閒伴白雲契渴飲湖中水飢啄山中糈舒卷凌長  
空不向人間寄



焚餘

寂寂衡門草太元相知博得一桓譚只緣老去還投閣翻羨伊人名不傳

董含字閱石華亭人順治乙未進士有藝葵詩集

登穹窿謁句曲行宮

山勢岩巖欲到難玉真宮殿擁千官香飄下界青冥近磬入諸天碧落寒洞口斷雲朝放鶴石根晴樹暮棲鸞金門羽客龍泥印夜禮星辰上醮壇

王揆字端士號芝廬太倉人順治乙未進士有芝廬集

詩話端士爲煙客長子麓臺之父梅松題其北歸草云南內舊人逢庚信北朝文士識崔陵

壬辰北歸居楓橋別業

歸來投別業雞犬一庭前雪重千門樹湖吞萬井煙鴟夷

寒食廟蝦菜夕陽船何似營平路黃沙獵火天

讀山翁大師新蒲綠依韻柬寄

江頭老父話興亡蒲柳春光又十霜徒有子規愁望帝更  
無鸚鵡憶明皇唐陵麥飯悲寒食漢臘桑門祝上方指示  
傍人盡流涕講堂鐘鼓暮雲黃

王撰字異公太倉人有三餘集

詩話異公畫承家學論者謂其峯巒樹  
石無不肖似煙客可稱具體詩清婉

夜宿山樓

重重煙靄望中收漁網參差古渡頭木葉凋時孤雁遠月  
華高處一橋浮謝公屐冷山無恙白傅船空水自流話盡  
淒涼十年淚秋風殘醉卧南樓

哭外舅鹿城顧大宗伯

丙戌死難溫  
州江心寺

閩嶺衣冠擁殿墀偏安猶見漢威儀驅車海嶠看傳檄拜  
表江關始出師萬里弓刀空報主一船棺槨僅從兒靈旗  
夜雨歸何處指點文山異代祠

贈杜于皇

憶自分攜厯變更訪君曾過石頭城人驚夔府貧來句世  
重樊川亂後名此地溪山千里夢今宵尊酒廿年情西陵  
放櫂乘秋漲好待荒郊泛月明

盧廷簡字子閑江都人順治乙未武進士

白鹿泉

白鹿銜花山徑幽寒泉疑到洞庭秋會聞說偈龍聽法幾  
見談經石點頭瀑水聲從檐際落冰花飛向澗中收仙蹤  
何處尋遺響曉夜涓涓不斷流

晚晴籜詩匯卷二十七終